

## 2 Petrus

### Nai' Petrus in surat no nuan ii

#### *Tabe ma haan buseet*

<sup>1</sup> Surat re' ia na'ko au, nai' Simon Petrus kau.\* Au 'jair Yesus Kristus In aan renu'-aan reka'. Au 'jair In haef amsa', re' In nreek haefan kau 'nao 'eu mee-mee he utoon anmatoom nok Ne.

Au 'tui surat re' ia 'eu ki re' ampirsai mrair meu Yesus Kristus. Natuin Uisneno In neekn ee namneo ma namnoon, In nfei ranan he hi bisa mpirsai meu Kristus, on re' hai. Rais pirsait naan ma'oos re'uf neu kit ok-oke'. Kristus anjair hit Uisneno, ma In njair Tuaf es amsa' re' nsoi nafetin naan kit na'ko hit saant am penu sin.

<sup>2</sup> Au 'toit he hi bisa mihiin mirek-reko' Uisneno, ma mihiin mirek-reko' hit Usi' Yesus. Maut he sin naruru' ma nakrira' Sin nekak arekot neu ki, he hi bisa mmoin nok mamut, rais rame', ma tainina'.

#### *Uisneno npiir Iin na, rarit no'en naan sin he neman neu Ne*

<sup>3</sup> Nai' Yesus anmui' kuasa re' huma' mese' on re' Uisneno In kuasa. Es naan ate, Nai' Yesus anfee nrair kit are' kanan saa'-saa' re' hit tperluu, he tmoin tamneo ma tamnoon tatuin

---

\* **1:1** Tuis uab Yunani bian antui mnak, "Simon Petrus" Bian antein antui mnak, "Simeon Petrus". Uab tuka' *Simeon* naan, na'ko uab Ibrani. In uab Yunani es re' *Simon*. Onaim ahiint ein ok-oke' nak, Simon Petrus ma Simeon Petrus naan, tuaf mese'.

Uisneno In romin. In nmoe' on re' naan, natuin hit tahiin Je nok reko. Ma In es re' no'en naan kit he tjair Iin na, natuin In ro reko ma mapina'-makraha'. <sup>4</sup> Nai' Yesus anfee nrair are' kanan saa'-saa' re' pentiing neu kit. Fin unu' te, In nba'an anrair he nfee saa'-saa' ein naan. In rais manbaa'n ein reok re'uf. In nfee sin ok-oke' neu kit, he hit neek ii bisa njair on re' Uisneno In nekan. Ma hit bisa tapein fetin ta'ko rais maufinu re' mansian pah-pinan ia nroim he nmoe' je, natuin sin suma nmonin natuin sin roimk ein kuuk, ma ka ntahan naan fa sin tuak ein.

<sup>5</sup> Es naan ate, au 'roim he hi mhaek ma'tani' he mmoe' rais reko.

Fin hi mpirsai mrair meu Nai' Yesus, mes naan ka nanokab fa fe'.

Ammeup rais reko piut.

Mihiin Uisneno reko nneisi ntein.

<sup>6</sup> Mes kais suma mtea haa naan.

Minoni' he hi mbi moint ii in nanan hi mtahan maan hi tuam ein naan.

Mes naan ka nanokab fa fe'e msa'.

Ansuun oras hi mipein susat, hi ro he maran ma mtahan piut, kais amtet-koit.

Mes ammo'e nneis na'ko naan antein.

Ammoe' are' kanan rasi mituin Uisneno In romin.

<sup>7</sup> Mes kais amtea naan ahaa.

Miruru' ma mikrira' manekat meu hi aok-bian apirsait ein.

Mes naan ka nanokab fa fe'.

Fin ambi moint ii in nanan hi ro he mma-neek piut.

<sup>8</sup> Karu hi mmoin on naan ate, rais rekon re' ia na'baab ok anteni', naan anmoe' ki he mihiin mirek-reko' hit Usi' Yesus Kristus. Rais rekon

re' ia, ka ruum am parsuum fa, ma ka nporin fa oras amsa'. Fin rais rekon re' ia nmoe' ki he mihiin mirek-reok' Ee. <sup>9</sup> Karu nmui' tuaf re' ka nroim fa he on naan, in natenab par-paar aah. In ka nkus fa saa' re' et in human ma in matan, on re' anfoor. Fin Uisneno nnoes nain tuaf naan in sanat ma penu sin, he in neekn ee bisa nakninu'. Mes tuaf naan annikan anrair.

<sup>10</sup> Aok-bian manekat arki! Oras ia, hi ro mhaek ma'tani' mtein. Uisneno npiir naan ki he mjair Iin na, rarit hi iim meu Ne. Oras ia, hi ro he miruru' ma mikrira' mak, hi mtaam amjair In nonot-asar. Karu rasin ia re' au 'ait sin fe'e na na'baab ok piut anbi hi 'moinm ein, hi of ka mmouf main fa. <sup>11</sup> Nok ranan naan, Uisneno nroim he nfee ki rais jes re' ma'tain re'uf. Es re' In nfei ranan ma nfee ki hak he mtoup Yesus Kristus anjair hi Usif, he mmoin piut-piut mok Ne. Fin In re' naan hit Usi'. Ma In re' naan Tuaf re' nsoi nafetin naan kit na'ko hit sanat ma penu sin imsa'.

### *Nansaa' am es nai' Petrus antui on naan?*

<sup>12</sup> Hi mihini mrair rasin naan re' au 'ait ma 'teek sin fe'e na, ma hi maran ma mtahan ma'tani', natuin hi mpirsai saa' re' batuur. Maski on naan amsa', au he umnaub ufani' rasin re' ia 'eu ki fani-fani, maut he hi kais annikan. <sup>13</sup> Au ka 'konan ki fa he hi mnikan. Au he umnaub ufani' ki, he hi bisa mitenab piut-piut rasin re' ia. Fin oras au 'moin fe' 'bi pah-pinan ia, pantas karu au umnaub ufani' ki rasin re' ia. <sup>14</sup> Ka 'roo fa te, au he 'maet jen. Hit Usi' Yesus Kristus natoon anrair kau on naan. Es naan ate au uhiin 'ain. <sup>15</sup> Maski au 'mate 'rair, mes au 'haek ma'tani' oras ia, he hi mimnau piut nok rasin re' ia.

*Hit tkius ma tiit atrair Nai' Yesus In pinan ma krahan*

16 Unu' te, au 'ok au partei ngguin mireta' mrair meu ki anmatoom nok hit Usi' Yesus Kristus. Hai mireta' amsa' am mak, oras In nkoen On anfain neem, In neem nok kuasa re' ma'tani'. Bataur, tua! Naan ka reet poi fa. Fin hai mireta' meu ki anmatoom nok saa' re' hai mkius ma miit kiim meik hai matam fuam ein kiim! Es naan ate hai mihiin Nai' Yesus In pinan ma krahan naan, on re' uis kou' goes. <sup>17-18</sup> Neot es, hai mibua mok Nai' Yesus anbi Uisneno In a'to'ef akninu'. Onaim Aam Uisneno kuun es re' natoon anmatoom nok Nai' Yesus In pinan ma krahan. Fin oras naan, hai mneen haanf es, re' reok re'uf anpoi na'ko neon goe mnak,

“In re' ia, Au Aan neka'.

In nhariin Au nekak.”✧

19 Naan anmoe' kit tpirsai ttein anmatoom nok rasin re' hit ttoupu trair sin ta'ko mafefa kninu' Uisneno un-unu' sin. Onaim reko nneis hi mmoe' mituin sin haan manba'an! Fin sin haan manba'an naan nahuum on re' pauk goes re' anpiin anbi baer meis'okan. Onaim hi ro he mneen ma mitniin sin haan manba'an naan tar antea Nai' Yesus ankoen On anfain neem. Nok ranan naan, hi bisa mihini mtein. Fin, naan on re' hi mkius faif noem je, na' hi mkius maans ee nsae he ntana' are' saa'-saa'.

20 Mimnau, fin Uisneno In mafefa kniun' ein natoon nain rasi mfaun. Mes sin haan

---

✧ **1:17-18** Nai' Mateos 17:1-5, Nai' Markus 9:2-7, Nai' Lukas 9:28-35

manbaa'n ein ka natuin fa sin 'roimk ein kuuk.†  
 21 Natuin saa' re' sin ntui sin naan, ka na'uu ma na'baa' fa na'ko saa' re' sin nromin he na'uab sin. Mes naan na'uu ma na'baa' nbi Uisneno, natuin saa' re' In Asmaan Akninu' naruru' ma nakrira' sin.

## 2

### *Tuaf re' anfee noni' puta-kriut*

1 Unu' te, anmui' atoin Israelas bian nak, sin njarin mafefa kninu' Uisneno. Te kaah, sin nputa-kriun. Hi of miit ma miteef tuaf on re' sin ambi hi sonam ma hi tnanam. Fin tuaf bian nak, sin nfeen noni' anmatoom nok Uisneno, mes naan puta-kriu goah. Sin nanoni' na'kor-koro' sin tenab reu'f ein. Etun sin bisa nataam sin noin' ein re' ka namneo ma namnonon fa. Karu hi mneen ma mitniin sin noin' ein, hi of mimreu'. Sin nasuan ma ntorak am nak, Usif Yesus naan, ka sin usin fa. Te kaah, In es re' ansoi nafetin naan sin anpaek baen ma'oos re'uf. Natuin sin i'moe'k ein on naan, of sin kuuk namre'un rabah.

2 Maski on naan, mes too mfaun ein of natuin sin, ma nmo'en tafi'-tafi' re' ka namaeb ok nahinin fa. Atoni' of na'uab re'uf anmatoom nok noni' re' batuur, natuin sin i'moe'k ein naan. 3 Tunggur aputa-kriut ein naan, akomat

---

† **1:20** Uab Yunani nbi re' ia, in sairt ii bisa nono' teun. 1) Mafefa kniun es na'uab ka bisa natuin fa in roimn ee kuun; 2) ka tiit fa tuaf es, re' nahiin sarit ai' oten na'ko Uisneno In mafefa kniun' ein sin haan manba'an sin ok-oke'; 3) karu hit he tahiin Uisneno In mafefa kninu' es in haan manba'an, in sarit ai' in oten ka na'kii' fa nbi haan manba'an naan anmees kuun, mes ro he natai nok Uisneno In Kabin ma Prenat sin a'teme-'teme.

ma aparu'. Sin nkaran huma'-huma' he bisa napoi ki ma ntoup naan hi roit ein. Mes kais amnikan, fin Uisneno njair Afeek Rasi re' ka ntuup niit fa. Na'ko unu', In nabarab he nhukun sin. Sin of namre'un nkonon.

<sup>4</sup> 'Tope' on re' unu' te, Uisneno In ameput bian nbin sonaf neno tunan nmo'en sanat. Mes Uisneno re' njair Afeek Rasi ka nafetin sin fa. In nporin nain sin anbin ai abar-barat, ma nataam sin nbin Koon Meis'okan re' Mnanu'. Sin npaon nbin bare naan tar antea in oras sin nbaisenun n'ain Ee.

<sup>5</sup> On naan amsa' atoin un-uun ein. Oras naan, sin nmoin nok 'moe' maufinu, ma ka ntoe fa Uisneno. Mes Uisneno n'ator he In tuaf neek amne'o es, kaan ee nai' Noh, naruru' ma nakrira' ranan he mansian ii bisa nmoin namneo ma namnoon. Mes sin ka nromin fa he nneen ma natniin ee. Etun Uisneno nfee noe sako' he nareu' mansian ii re' ka ntoe natuin Ee fa. Mes In nsoi nafetin nai' Noh ma in uim je nanan. Sin arsin tuaf faun.✧

<sup>6</sup> Neot es antein, atoin un-uun ein na'kon kota Sodom ma kota Gomora sin nmonin nbin maufin re'uf. Rarit Uisneno nhukun sin. In nout nakrati' are' kanan saa' ii ok-oke' tar antea nputu nmaten. Rarit mansian abitan naan anmaten ok-oke'. Naan anjari 'tope' neu tuaf bian re' nroim he nmoni nbi maufinu, ma sin ka ntoe natuin fa Uisneno. Sin bisa nahiin nain sin uak ein karu sin ka na'pisan fa na'ko sin sanat ma penu sin.✧ <sup>7</sup> Mes oras naan, anmui' tuaf es kaan ee nai' Rot, re' nmoin namneo ma namnoon. In nhae nmaet jen nok atoin maufin ein sin i'moe'k ein re'

---

✧ 2:5 Reta' Ahun-hunut 6:1—7:24 ✧ 2:6 Reta' Ahun-hunut 19:24

bainesi', re' ka nneen ma natniin fa Uisneno. Rarit Uisneno nsoi nafetin nai' Rot na'ko bare naan. ✧ <sup>8</sup> Nai' Rot anmees anroim he nmoe' rais reko, mes in nmoni nbi abitan kota Sodom ma kota Gomora sin atnaank ein. Neno-neno te, in nkius ma nneen sin antanhai Uisneno In Atoorn ein. Naan anmoe' in neekn ee nsuus.

<sup>9</sup> A'toep ein re' naan ok-oke' naruru' ma nakrira' mnak, Uisneno nmui' ranan he nsoi nafetin tuaf re' nneen ma natniin Ee na'ko 'taka' huma'-huma'. In nfee hukun ma'fena' neu tuaf ein re' nmoni nbin 'moe' sanat. Ma In nmoe' on naan piut, tar antea oras In nafeek tuaf mese'-mese' sin rasin. <sup>10</sup> Hukun ma'fena' naan, nfee je nneis-neis neu tuaf re' suma nmonin nbin sanat ma penu sin, natuin sin roimk ein kuuk. Sin ka nromin fa he nneen ma natniin tuaf es amsa', ma sin nkana'paar re' anaa' apreent ein ok-oke'. Ro tebes, Uisneno of anhukun sin.

Rarit tunggur aputa-kriut ein fe'e na, sin ro nabranin, ma naiks ok. Sin ka nromin fa he naruru' ma nakrira' rais hormaat, ma sin ka namtaun fa he na'uab na're'uf Uisneno ma In ameupt ein sonaf neno tunan. <sup>11</sup> Te kaah, In ameupt ein sonaf neno tunan ma'tani' nneis na'ko tunggur aputa-kriut ein naan. Maski on naan amsa', ameupt ein ka na'uab na're'uf fa tunggurn ein naan anbi sin Usin In human ma In matan. Ma sin ka nasaeb ein fa sanat neu tunggurn ein naan amsa'.

<sup>12</sup> Mes tunggur aputa-kriut ein naan na'uab na're'uf are' kanan rasi re' sin kuuk ka nahiin sin fa. Sin on re' mu'it re' ka natenab nahiin fa! Reko nneis, amheek maan sin maut he sin

---

✧ 2:7 Reta' Ahun-hunut 19:1-6

namre'un kuuk! Fin re' naan sin uak ein. Sin of namre'un nkonon, natuin sin i'moe'k ein. <sup>13</sup> Sin nasusab tuaf amfaun. Rarit Uisneno of nasusab sin, natuin sin i'moe'k ein re' ka batur fa. Sin feest ein tafi'-tafi' bu'-bua'. Sin nmo'en tafi'-tafi' msa' oras manas, he too mfaun ein bisa nkuis sin maufinu. Sin ka namaeb ok fa, rarit sin nareu' hi kaanm ein. Karu sin nbukaen nbin fesat nabu-buan nok ki, sin suma nmoe' natuin sin roimk ein re' maufinu. <sup>14</sup> Sin maatk ein an'eern ahaa he namin bifee re' nroim he nmakaken nok sin. Sin nmonin nbin goah ahaa 'moe' maufinu. Sin nromin he namin tuaf re' in rais pirsait neu Uisneno ka na'kii' fa, rarit nfuri' sin he natuin 'moe' maufinu. Sin nam-namin ranan he sin nakoman piut. Ro tebes, Uisneno of anhukun sin!☆

<sup>15-16</sup> Unu' te, tunggur aputa-kriut ein naan, tuaf ein re' natuin raan amneot, mes a'roo-roo te sin nbeon ok. Nok ranan naan, sin on re' nai' Balaam un-unu' naan, es re' Bosor in anah.\* In re' naan Uisneno In mafefa kniun es. Mes in nroim na'seke' neu mnaim roit, onaim in nmoe' rasin re' ka namneo ma namnoon fa. Neot es, Balaam ansae bikaes keledai. Bikaes keledai sin ka bisa na'uab ein fa. Mes oras naan Uisneno nmoe' bikaes keledai naan bisa na'uab on re' mansian! Rarit bikaes keledai naan nakaina' nai' Balaam, natuin in nmoe' maufinu. Bikaes keledai naan nroim he in nasnaas, he in kais anmoe' maufinu ntein, on re' amaunut.☆

---

☆ **2:14** Reta' Ahun-hunut 6:5 \* **2:15-16** Tuis uab Yunani re' reko nneis nak, *Bosor*. Tuis bian antein nak, *Beor*. Tuis uab Yunani ok-oke' sin antuin am nak, *Balaam*. Suur Akninu' uab Indonesia ntui mnak, *Bileam*. ☆ **2:15-16** Surat Sensus 22:4-35



17 Tunggur aputa-kriut ein naan on re' oe maat es, re' ka mapake' fa, natuin in oe mata' naan anmeit. Sin on re' nipu' re' ka mapake' fa, natuin ain ee nfuu nporin. Uisneno nabarab nain baer meis'ookn es he ntahan sin. 18 Fin sin naikas sin tuak ein, mes ka ma'afa' fa. Sin nfuri' naan tuaf-tuaf he sin nmoe' natuin rais tafi' re' ka pantas fa. Sin nfuri' ma nkopo' tuaf re' fe'e nfani nbi ranan re' namneo ma namnoon, he sin nmo'en sanat antein. 19 Atoin aputa-kriut ein naan anbaa'n ein am nak, "Karu hi mneen ma mitniin kai, hi bisa mmoe' mituin hi roim ein kiim!" Mes tuaf re' na'uab on re' naan, on re' ate re' ka bisa nafeit on fa na'ko sin maufinu. Fin tuaf re' nkonan rais jes he n'ator in tuan, naan on re' in njair rasi naan in ate. 20 Karu mroim he mipein fetin mi'ko maufinu pah-pinan re' nhai'nisib ma n'oemetab kit, hit ro he tahiin ma ttoup hit Usi' Yesus Kristus. Mes karu nmui' tuaf re' ntet-koit na'ko Na, rarit anmafutu nfain nok rais maufinu on re' in nmoe' je unu', re' naan on re' rais maufinu naan an'aotr ee. Oras ia, sin namre'un ntenin! 21 Ka reko fa karu sin nahini nrair raan a'honis re' batuur, rarit antet-kotin, onaim ka nmoe' natuin fa rasin re' reko ma nakninu', re' Uisneno naprenat anrair sin neu kit. Reko nneis, karu sin ka nahiin nitan fa ranan re' namneo ma namnoon. 22 Anmui' tonas ma nee re' antoom tunggur aputa-kriut ein naan am nak, "Karu aus goe nroo', in naah nafani' in ro'o naan kuun." Anmui' bian antein re' nak, "Maski taniu traair faif jes, mes in ntebi nfain ma n'oban antein."✧

---

✧ 2:22 Fainekat 26:11

### 3

#### *Hit Usi' he nkoen On anfain neem*

<sup>1</sup> Aok-bian manekat arki! Surat re' ia, au surat no nuan ii 'eu ki. Anbi suur nua' ein re' ia, au umnaub ki, he hi bisa mitenab anmatoom nok rasin re' namneo ma namnoon. <sup>2</sup> Mimnau mafefa kninu' Uisneno sin uabk ein un-unu'. Mimnau Nai' Yesus In haef ein imsa'. Mitenab mirek-reko' anmatoom nok saa' re' hit Usi' naprenat sin he natoon ki. Fin In es re' nsoi nafetin ki na'ko hi sanat ma penu sin! <sup>3</sup> Mimnau on nai fe': anbi neon amsoupt ein anmui' tuaf akana'parat sin re' anmo'en tafi'-tafi' natuin sin roimk ein kuuk. Sin na'uab na're'uf are' kanan rasi re' batuur.✧ <sup>4</sup> Sin na'uab ein am nak, "Phueh! Nai' Yesus anba'an am nak, In he nkoen On anfain neem, ai'? Karu on naan, In et mee? Fin anmurai na'ko hit be'i-na'i sin anmaten, tar antea oras ia msa', ka na'bani' niit fa. Saa' ii ok-oke' nnao piut, anmurai na'ko Uisneno nmoe' neno tunan ma pah-pinan."

<sup>5-7</sup> Mes anmui' rais jes re' atoin aputa-kriut ein ka nahiin naan ee fa. Es re', na'ko ahun-hunut Uisneno suma na'uab ahaa, rarit neno tunan anjair nain. Onaim Uisneno anmoe' oe. Rarit In nbetis oe na'ko auf meto', ma nmoe' auf meto' npoi ma nboor neem na'ko oe. Uisneno na'uab anrair on mee te, naan nabaar piut.✧ A'roo'-roo te, Uisneno npaek noe sako' msa' he nareu' mansian ii ok-oke' et pah-pinan ia re' nmonin nbin oras nai' Noh anmoin.✧ Mes oras ia, Uisneno natoon nain saa' re' In he nmoe' je neu neno tunan ma pah-pinan. Oras

✧ 3:3 Nai' Judas 1:18 ✧ 3:5-7 Reta' Ahun-hunut 1:6-9

✧ 3:5-7 Reta' Ahun-hunut 7:11

ia In antah-tahan, mes nateef in oras, In he notu nporin sin. Fin Uisneno of nafeek hukun he nareu' nain tuaf re' ka ntoe natuin Ee fa. Maski on naan, mes atoin aputa-kriut ein naan ka namnaun fa nak, Uisneno of anmoe' natuin saa' re' In na'uab anrari.

<sup>8</sup> Aok-bian manekat arki! Kais amnikan rasi ia. Hit Usi' ka nsoi' fa oras on re' hit. Fin tatuin Ee, neno mese' bisa on re' toon niufn es. Ma toon niufn es, bisa on re' neno mees' aah.✧ <sup>9</sup> Karu hit Usi' anba'an he nmoe' rais jes, In nmoe' je natai nateef nok in oras, ma ka npa-pao fa. Anmui' tuaf bian natenab am nak, In mepu te 'roo. Te kaah fa, tua! Fin In sabaar ahaa, he npao in oras. Hit Usi' nroim he tuaf mese'-mese' ok-oke' na'pisan na'kon sin saant ein fe', he nasaitan sin saant ein ma penu sin, rarit nabain ein ma natuin Ee. Fin In ka nroim fa he tuaf-tuaf anbais ok nok Ne.

<sup>10</sup> Mes oras hit Usi' ankoen On anfain neem naan, ka tiit fa tuaf re' nahiin nain. Fin In amneman naan, nok askeekn aah, on re' abakat re' he ntaam neu uim jes in nanan. Oras naan, are' kanan baer' ein nbin neon goe tnanan anputun nmaten, on re' manas, funan ma kfuun ein ok-oke'. On naan amsa', pah-pinan ma in afan-nesan ok-oke'.✧

<sup>11</sup> Onaim karu saa' ii ok-oke' nputun nmaten on naan, hi ro he mjair tuaf on re' mee? Hi ro he mhaek ma'tani' he mmoin mituin Uisneno In romin. Hi ro he mmoin nok akninu'! <sup>12</sup> Hi ro he mpa-pao msa' Uisneno In amneman. Onaim hi ro he mhaek ma'tani' he mmoe' neno naan

✧ **3:8** Siit Pures-Bo'is sin 90:5 ✧ **3:10** Nai' Mateos 24:43, Nai' Lukas 12:39, 1 Tesalonika 5:2, Rasi Mnitaa neu nai' Yohanis 16:15

neem rabah. Oras naan, neon goe tnanan anputun nmaten. Ma are' kanan baer' ein nbin neon goe tnanan amsa' nputun ma nre'u nmaten.

<sup>13</sup> Mes of anmui' neno tunan huum fe'u ma pah-pinan huum fe'u. Uisneno nba'an anrair on naan, onaim hit tpa-pao rasi naan. Anbi bare naan suma nmu'i haa tuaf re' nmonin namneon ma namnonon.\*

<sup>14</sup> Onaim aok-bian manekat arki! Oras hi mpa-pao rasin re' ia, hi ro he mhaek ma'tani' he mjair atoin neek reko, tatuin Uisneno In tenab. Nok ranan naan, ka nmui' fa tuaf re' bisa nasaeb sanat neu ki. Amhaek ma'tani' he mmoin nok rais rame' msa'.

<sup>15a</sup> Fin hit Usi' naan ansabaar, maut he In bisa nsoi nafetin ki na'ko hi saant am penu sin.

### *Nai' Petrus nasoup in surat*

<sup>15b</sup> Hit aok-bian nai' Paulus antui nrair neu ki anmatoom nok rasi mfaun re' huma' mese', ai'? Uisneno es re' anfee ne mahinif on re' naan, es naan ate, in ntui on naan amsa'. <sup>16</sup> Ansuun oras, oras nai' Paulus antui surat, in ntui rasin ia msa'. Na'ko in suurt ein, anmui' rasi re' hit ro he taim ranan fe' na' theek taan in sarit. Anmui' tuaf amsa' re' na'e'ob nai' Paulus in sarit. Sin na'e'ob rasi bian amsa' anbi Uisneno In Suur Akninu'. Sin re' naan, esan re' apehet, ma tuaf re' sin rais pirsait ee ka na'kii' fa. Tuaf humaf on re' naan, of namre'un nkoon.

<sup>17</sup> Aok-bian manekat arki! Hi mihiin tunggur aputa-kriut ein naan sin raan a'honis. Onaim ampaant om! Fin sin ka nromin fa he nneen ma natninan atoran saa'-saa'. Sin nsoba' he

\* **3:13** Nai' Yesaya 65:17, 66:22, Rasi Mnitaa neu nai' Yohanis 21:1

nputa-kriu ki, maut he hi mbeon om mi'ko raan amneot. Mes kais amkonan sin he niis naan ki on naan. Fin hi ro he maran ma mtahan piut.

<sup>18</sup> Reko nneis, hi rais pirsait aan na'baab on piut. Fin hi mihiin hit Usi' Yesus Kristus, re' nsoi nafetin kit na'ko hit saant am penu sin. In he naruru' ma nakrira' In nekan arekot neu ki. Ma In nromi msa' he hi bisa mihiin mirek-reok' Ee mtein.

Au 'roim he mansian ii ok-oke' naikas na'rat-raatn Ee, na'ko oras ia tar antea nabar-baar!\*

Saloom,

Au nai' Petrus kau, tua.

---

\* **3:18** Tuis uab Yunani bian anteni' antuin "Amin!" anbin re' ia.

**Uisneno In Kabin ma Prenat: Rais  
Manba'an Fe'u nok Reta' Ahun-hunut  
Genesis and the New Testament in the Amarasi  
language of Indonesia  
Kejadian dan Perjanjian Baru dalam bahasa  
Amarasi dari**

copyright © 1999-2014 Unit Bahasa dan Budaya, Kupang NTT,  
Indonesia

Language: Amarasi

Translation by: Wycliffe Bible Translators

This translation is made available to you under the terms of the  
Creative Commons Attribution-No Derivatives license 4.0.

You may share and redistribute this Bible translation or extracts from  
it in any format, provided that:

You include the above copyright and source information.

You do not make any derivative works that change any of the actual  
words or punctuation of the Scriptures.

Pictures included with Scriptures and other documents on this site  
are licensed just for use with those Scriptures and documents. For  
other uses, please contact the respective copyright owners.

2022-03-11

---

PDF generated using Haiola and XeLaTeX on 21 Sep 2022 from source  
files dated 30 Nov 2021

60603d94-9a14-5831-a729-e3ba7b0ebc25